

Morning Regional Dogri News Bulletin, 19th May 2024

मार्निंग डोगरी न्यूज़ बुलेटिन, समें. 09-20 Hrs



Headlines

1. कल होने आले लोकसभा चुनां दे 5में गेड़ दे मतदान लेई सब्बै तैआरियां मुकम्मल। इस गेड़ तैह्त जम्मू कश्मीर दी बारामुला सीट सनें कुल 49 लोकसभा सीटें लेई वोट पोआए जांगन।
2. बारामुला कुपवाड़ा लोकसभा हल्के च कल 17 लक्ख कोला मते मतदाता चुनां मैदान च खड़ोते दे 22 मेदवारें दे सियासी भविक्ख दा फैसला करगंन।
3. दक्खनी कश्मीर दे बक्ख-बक्ख हिस्से च दऊं आतंकी हमले च इक साबका सरपंच दी मौत, जयपुर थमां आए दे दऊं सैलानी घायल।
4. आईपीएल च कल रातीं रॉयल चैलेंजर्स बेंगलुरु दी टीम चिन्नेई सुपर किंगस गी 27 रंज कन्ने हराइयै प्ले ऑफ च दाखल होई गई।



5th Phase Polling

लोकसभा चुनां दे 5में गेड़ लेई चुनां प्रचार कल खत्म होई गेआ। इस गेड़ तैह्त लोकसभा दी 49 सीटें पर कल वोट पाए जाडन जिंदे च बारामूला पार्लिमानी हलका की शामिल ऐ। इस गेड़ च बिहार दी 5 सीटें, झारखंड दी 3 सीटें, महाराष्ट्र दी 13, ओडीशा दिआं 5 सीटां, उत्तर प्रदेश दिआं 14 सीटें, पच्छिम बंगाल दी 7 ते केन्द्र शासत प्रदेश जम्मू-कश्मीर ते लददाख दी इक-इक सीट लेई मतदान होना ऐ। चुनां आयोग नै चुनाएं गी रमानदारी कन्ने करोआने लेई लोड़चदे सारे बंदोबस्त कीते दे न। तोआई 5में गेड़ तैह्त जम्मू-कश्मीर दी बारामूला-कुपवाड़ा संसदी सीट लेई कल मतदान होना ऐ। 17 लक्ख थमां बद्ध मतदाता 22 मेदवारें दे सियासी भागें दा फैसला कल करडन। लोकसभा चुनाएं दे 6में गेड़ तैह्त 6 राज्यें ते 2 केन्द्र शासत प्रदेशें च वोट पाए जाने न। इस गेड़ च 8 सौ नानुए मेदवार चुनां मैदान च न। जम्मू-कश्मीर दे अनंतनाग-राजौरी पार्लिमानी हलके लेई 20 मेदवार चुनां मैदान च न। चुनां आयोग नै इक बयानै च आखेआ ऐ जे इस गेड़ तैह्त 58 हलकें च मतदान होना ऐ ते कुल इक हजार 9 सौ 78 नामांकन भरे गे हे। इस गेड़ तैह्त नामांकन भरने दी खीरी तरीक 6 मई ही। 6में गेड़ तैह्त 58 संसदी हलकें च मतदान होना ऐ। उत्तर प्रदेश च 14 पार्लिमानी हलकें लेई सब्बनें थमां मते 470 नामांकन भरे गे।



Baramulla

5में गेड़ तैहत जम्मू कश्मीर दी बारामुला-कुपवाड़ा संसदीय सीट लेई कल मतदान होना ऐ। 17 लक्ख थमां बद्ध मतदाता 22 मेदवारें दे सियासी भागें दा फ़ैसला कल करगन। बारामुला पार्लिमानी हल्के च 4 जिले बारामुला, कुपवाड़ा, बांडीपोरा ते बडगाम दे हिस्से च होने आले मतदान लेई कुल 2 ज्हार 103 मतदान केन्द्र कायम कीते गेदे न। मतदान बडलै 7 बजे शुरू होग ते संजा 6 बजे तगर जारी रौहग। जम्मू कश्मीर दे मुख्ख चुनां अधिकारी हुंदे मूजब कुल 17 लक्ख 37 ज्हार 868 मतदाता न जिंदे च 8 लक्ख 75 ज्हार 831 मर्द, 8 लक्ख 62 ज्हार महिला मतदाता न ते 34 थर्ड जंडर मतदाता न। बारामुला पार्लिमानी हल्के लेई कुल 2 ज्हार 103 मतदान केन्द्रें पर लाईव वैबकास्टिंग करने दे इंतजाम कीते गेदे न। कश्मीर खित्ते दे विस्थापत मतदाताएं लेई 26 विशेष मतदान केन्द्र कायम कीते गेदे न। इंदे चा 21 मतदान केन्द्र जम्मू च, 4 दिल्ली च ते इक उधमपुर जिले च कायम कीता गेआ ऐ।



Baramulla Contest

बारामुला कुपवाड़ा पार्लिमानी हल्के लेई कल चुनां प्रचार समाप्त होइ गेआ। नैशनल कांफ्रेंस दे उपप्रधान उमर अब्दुल्ला, जम्मू कश्मीर पीपल्स कांफ्रेंस दे चेयरमैन सज्जाद गनी लोन ते आजाद मेदवार इंजीनियर रशीद जेह्दे इसलै तिहार जेल च बंद न, इंदे बश्कार मुख्ख करी मकाबला मन्नेआ जा'रदा ऐ। इस लोकसभा सीट तैहत 18 विधानसभा हल्के औंदे न। एह पार्लिमानी हल्का 4 जिले च फ़ैले दा ऐ जेह्दे च कुपवाड़ा, बारामुला, बांडीपोरा ते बडगाम शामिल ऐ। 2019 आले चुनाएं च बारामुला संसदीय सीट लेई 4 लक्ख 57 ज्हार 931 मतदाता वोट पाने दे अपने अधिकार दा इस्तेमाल कीता हा। नैशनल कांफ्रेंस दे एम.ए.लोन होरें इक लक्ख 33 ज्हार 4 सौ 26 वोट लेइयै सीट पर जित्त हासल कीती ही, पीपल्स कांफ्रेंस दे राजा एजाज अली होरें इक लक्ख थमां मते वोट हासल कीते हे। इंजीनियर रशीद गी इक लक्ख 2 ज्हार 168 वोट हासल होए। बीजेपी च श्रीनगर बारामुला ते अनंतनाग-राजौरी पार्लिमानी हल्के लेई कोई मेदवार चुनां मैदान च नेइं तोआरेआ ऐ।



UT-MCC

लोकसभा चुनां जारी न ते इसी दिक्खदे होई आदर्श आचार संहिता बी लागू ऐ। इस दरान बक्ख-बक्ख सुरक्षा अजेंसिएं 89 करोड़ 44 लक्ख रपे दी नकदी ते होर दुआ समेयान जब्त कीता ऐ। चुनां आयोग दी रिपोर्ट मूजब जिस दिन आदर्श आचार संहिता लागू होई ओह्दे मगरा अज्ज तगर जम्मू कश्मीर च बक्ख-बक्ख मैहकमे

आस्सेआ नकदी, शराब, नशीले पदार्थ ते होर दुआ समेयान जब्त कीता गोआ जेहदे च पुलस मैहकमे आस्सेआ 85 करोड़ 66 लख रपे इंकम टैक्स मैहकमे आस्सेआ 32 लख रपे, एक्साइज मैहकमे आस्सेआ 92 लख रपे ते नशीले पदार्थ दी रोकथाम सरबंधी मैहकमे आस्सेआ 2 करोड़ 32 लख रपे दे नशीले पदार्थ जब्त कीते गे।

<><><><><><>

DGP Baramulla

पुलस महानिदेशक आर.आर.स्वैन होरें बन्ने आले जिले कुपवाड़ा जित्थें औंदे सोमवारें लोकसभा चुनाएं तैहत वोट पाए जाने न, लेई सुरक्षा तैआरिएं दा जायजा लैता। उनें बलें दी तैआरी ते चुनां दरान कनून बवस्था गी बघाई रखने सरबंधी तौर तरीके पर बी चर्चा कीती। इस दरान पुलस दे होर दुए आला अधिकारी बी मजूद हे।

<><><><><><>

6th Phase

लोकसभा चुनाएं दे 6में गेड़ तैहत 6 राज्यें ते केन्द्र शासत प्रदेशें च वोट पाए जाने न। इस गेड़ च 889 मेदवार चुनां मैदान च न। जम्मू कश्मीर दे अनंतनाग–राजौरी पार्लिमानी हल्के लेई 20 मेदवार चुनां मैदान च न। चुनां आयोग नै इक ब्याने च आखेआ ऐ जे इस गेड़ तैहत 58 हल्के च मतदान होना ऐ ते कुल इक जहार 978 नामांकन भरे गे हे। इस गेड़ तैहत नामांकन भरने दी खीरी तरीक 6 मइ ही। 6में गेड़ तैहत 58 संसदीय हल्के च मतदान होना ऐ। उत्तर प्रदेश च 14 पार्लिमानी हल्के लेई सब्बने थमां मते 470 नामांकन भरे गे। हरियाणा दी 10 सीटें लेई 370 नामांकन दर्ज होए। झारखंड दी रांची संसदीय सीट लेई सब्बने थमां बद्ध 70 नामांकन भरे गे।

<><><><><><>

Terror Attack

25 मई गी अनंतनाग–राजौरी लोकसभा सीट लेई होने आले मतदान कोला पैहले आतंकवादिएं जंदी रातीं दऊं बक्ख–बक्ख वारदातें गी इंजाम दिंदे होई इक साबका सरपंच दी गोली मारियै हत्या करी दित्ती ते इक सैलानी जोड़े गी घायल करी दित्ता। जानकारी मूजब शोपियां जिले दे हीरपोरा इलाके च किश बे–पंछानू आतंकवादिएं साबका सरपंच ऐजाज अहमद गी भलेया कोला आइयै गोली मारी जेहदी अस्पताले च जख्में दी ताव नेई जरने कारण मौत होई गई। सुरक्षाबलें इलाकें गी घेरिये तुपाई आली कारवाई शुरू करी दित्ती ऐ। तोआई अनंतनाग दे यन्नार इलाके च आतंकवादिएं इक सैलानी जोड़े पर हमला कीता जिंदी पंछान राजस्थान दे जयपुर शैहर दे बसनीक तबरेज ते ओहदी घरै आली फरहा दे तौरा पर कीती गई ऐ। कश्मीर जोन पुलस ने सोशल मीडिया

प्लेटफार्म एक्स पर जानकारी दित्ती ऐ जे घायल दौनें सैलानिएं दा अस्पताल च इलाज चलै करदा ऐ ते उंदी हालत खतरे कोला बाहर ऐ।



Mela

सांबा जिले दे सोआंखा ग्रां च अगले म्हीने लगने आले बाबा सिद्ध गोरिया नाथ हुंदे सलाना मेले लेई तैआरियां शुरू होइ चुकी दियां न। उत्तर भारत दे सब्बने शा बड्डे मेलें चा इक बाबा सिद्ध गोरिया मेले च जम्मू कश्मीर दे बक्ख-बक्ख हिस्सें दे इलावा पंजाब, हिमाचल प्रदेश, राजस्थान, हरियाणा ते होरने किश राज्यें थमां बी लोक इस मेले च शिरकत करदे न।



Samba Yatra

सांबा दे जिला विकास कमीशनर अभिषेक शर्मा होरें श्री अमरनाथ जी दी यात्रा दी पछौकड़े च सरबंधत सब्बने मैह्कमे गी आखेआ ऐ जे ओ यात्रा लेई तैआरिएं गी बेहतर ढंगै सिर तोड़ चाढ़ना जकीनी बनाने लेई पैह्ले थमां आपूं च नेड़मा तालमेल बनाइयै कम्म करन। यात्रा तैआरिएं बारे सददी गोदी इक बैठक दी अध्यक्षता करदे होई डीसी होरें आखेआ जे सांबा जिले दिएं हदें अंदर पौंदे, यात्रिएं दे ठैहरने लेई सब्बने 26 केन्द्रें च लोड़चदे सब्बे इंतजाम पैह्ले थमां करी रखे जान। मीटिंगा च जानकारी दित्ती गई जे चिची माता ते नोनाथ आश्रम च आरएफआईडी कार्ड जारी करने आले 2 विशेष केन्द्र बनाए जांगन। एहदे इलावा राष्ट्रीय जरनैली शिड़क प्राधिकरण एनएचएआई दे अधिकारिएं गी निर्माण कम्में ते साईन बोर्ड लाने दे कम्में च तेजी आनने लेई आखेआ।



Kishtwar Rally

जम्मू कश्मीर केन्द्र शासत प्रदेश दे सब्बने 20एं जिलें च चलै करदे सड़क सुरक्षा अभियान दे तौर पर शुरू कीती गोदी मिशन सेव लाइब्ज रोड सेफटी रैली कल किशतवाड़ जिले च पुज्जी। जेहदा मकसद सड़क सुरक्षा ते ट्रैफिक नियमें बारे लोकें गी जागरूक बनाना ऐ। किशतवाड़ च रैली प्रभारी ते प्रतिभागिएं लोकें कन्नै गल्लबात कीती जेहदे मगरा एडीडीसी गुलाम रसूल होरें इसी झंडी दस्सियै श्रीनगर लेई रवाना करी दित्ता।



IPL

आईपीएल क्रिकेट च रॉयल चैलेंजर्स बेंगलुरु एम.चिन्नास्वामी स्टेडियम च करो जां मरो आले मकाबले च चिन्नेई सुपर किंग्स गी 27 रंजें कन्नै हराइयै प्ले ऑफ च दाखल होई गई ऐ। पैहले बल्लेबाजी करदे होई रॉयल चैलेंजर्स बेंगलुरु नै 5 विकटां मोआइयै 218 रंज बनाए। प्ले ऑफ दी द्रौड़ च बने रौहने आस्तै चिन्नेई सुपर किंग्स गी 201 थमां पैहले रोकना हा। रॉयल चैलेंजर्स बेंगलुरु तांई फाफ डुप्लेसिस नै 39 गेंदें च 54 रंज बनाए जिल्लै के विराट कोहली नै 29 गेंदें च 47 रंज बनाए। परते च चिन्नेई सुपर किंग्स दे रचिन रविन्द्र नै 37 गेंदें च 61 रंजें दी मदाद कन्नै तैह 20 ओवरें च 7 विकटें दे नुकसान पर 191 रंज गै बनाई सकी। इस जित्त दे कन्नै गै रॉयल चैलेंजर्स बेंगलुरु, कोलकाता नाईट राईडर्स, राजस्थान ते सनराईजर्स हैदराबाद कन्नै प्ले ऑफ च शामिल होई गई ऐ ते चिन्नेई सुपर किंग्स इस द्रौड़ थमां बाहर होई गई।



Weather

मौसम विभाग नै आखेआ ऐ जे इस म्हीने दी 27 तरीक तगर गर्म मौसम थमां राहत मिलने दी कोई संभावना नेई ऐ। जम्मू च कल बद्धोबद्ध तापमान 41.6 डिग्रह गैल्सियस दर्ज कीता गेआ जेहड़ा इस मौसम दा सब्बने थमां बद्ध ऐ ते घट्टोघट्ट तापमान 23.9 डिग्री सैल्सियस दर्ज कीता गेआ।

